


Dem ehe ich weyter come will ich vor eyn lini recht in der mitt von eynander lernen teylen/ vnd das also/ Dife fůrgeben lini/ sey ober zwerch. a. b. nun setz eyn zirkel mit dem eyn fuß in den puncten. a. vnd den andern in den puncten. b. vñ reiß von dann vnder sich vñ ober sich so weyt du des bedarffst/ Darnach laß den ein fuß des zirkels still steyn/ in dem puncten. b. vnd reiß mit dem andern aus dem puncten. a. krum ober sich vñ vnder sich/ Wo dann dise zwen zirkel reiß sich schliessen/ da setz oben eyn. c. vñ vnden ein. d. Darnach reiß eyn gerade lini/ c. d. die schneidet a. b. in der mitt von eynander/ da setz eyn. e. Item wer eyn gerade lini auff eyn zirkeltrum wil setzen/ der thue im zugleich weis/ wie oben angezeygt ist/ laß das zirkeltrum. a. b. seyn/ vnd die gerade lini. c. d. auch soll man in eyn hol zirkeltrum/ so man des bedarff/ der obgemelten meynung nach/ eyn aufrechte lini setzen. Es ist nuß zu wissen/ eyn fůrgebne lini sie sey lang oder kurz/ in drey gleiche teyl zu teylen/ Dem thu also/ die fůrgeben lini sey. a. b. die setz vnden auff eyn zwerchlini. c. d. darnach nym mit eynem zirkel munder dann die halb leng/ von der auffrechten. a. b. vñ setz den zirkel mit dem eyn fuß auff die zwerchlini. c. d. neben die lini. a. b. vnd reiß damit. z. leng aufrechte ober sich/ vñ zeuch eyn gerade lini dardurch/ also das sie paralel sey gegen. a. b./ Dife lini sey oben. e. vnden. f. vnd die zwen mittelpuncten so die z/ gleiche felt machen/ die bezeychen mit ziffern. 1. 2. Darnach zeuch von dem end. e. eyn gerade ortlini herab auff das end. a. vnd fort hinauß bis auff die zwerch lini. c. d. vnd wo sie anrůrt setz eyn. g. Darnach zeuch auß dem puncten. g. zwu gerad ortlinien in die puncten. 1. 2. so wirdet die lini. a. b. von dem durchschneyden der ortlini/ die ys gezogen sind in z/ gleiche felt geteylt. Noch eyn andere meynung/ eyn lini in z/ gleiche teyl zu teylen mach vier zwerch barlini mit ziffern. 1/ 2/ 3/ 4/ in gleicher weiten ober eynander/ darnach nim dein fůrgenome lini oben. a. vñ den. b. vnd leyn sie mit dem ein end. a. oben an die zwerchlini. 1/ vñ vnden mit dem end. b. an die zwerchen. 4/ so teylen die mitlern zwu zwerchlini. 2/ 3/ die lini. a. b. in drey gleiche teyl wie ich das hie vnden auch hab auffgerissen. Solch wegz hab ich hie vnden auffgerissen/ vnd bey dem hollen zirkeltrum hab ich in der auffrechten/ c. d./ da sie durchschneyt eyn/ f. gesetzt.



Wen wil ich leren machen eyn lini/ die eynem wolgestalt'n ey gleich werde dem thu also mach eyn gerade zwerchlini/ der anfang sey. a. vñ end. b. die teyl mit. 9. puncten in. 10/ gleiche felt/ Darnach setz eyn zirkel mit dem eyn fuß mitten auff die lini/ in den puncten. 5. vñ mit dem andern fuß in den puncten. 3. vnd reiß eyn ganze runde lini/ durch den puncten. 7. oben vñ vnden herumb/ Darnach setz eyn zirkel mit dem eyn fuß/ in den puncten. b. vñ mit dem andern in den puncten. 3. vnd dann reiß rund vnder sich herab/ Darnach setz den zirkel mit dem eyn fuß in den puncten. a. vnd mit dem andern in den puncten. 7. vnd reiß auch vnd dann vnder sich herab wo dann die zwen runden reiß sich schliessen/ da setz eyn. c. Darnach reiß vnder der zirkellini eyn zwerch barlini gegen der obern. a. b. vñ wo dise zwerchlini vñ den langen runden rissen durchschneiden werde/ in die selben puncten setz vnder dem puncten. 3. eyn. e. vñ vnder dem puncten. 7. eyn. d. Darnach reiß eyn aufrechte lini aus dem puncten. 5. in den winkel. e. vnd wo sie die zwerchlini. c. d. durchschneyde/ da setz. 10. Darnach theyl das zirkeltrum zwischen. 3. vnd. 10. mit eyn puncten. f. in der mit voneynander/ Darnach teyl das ander trum zwischen. 10. vnd. 7. auch mit eyn puncten. g. in der mit von eynander/ Vnd dann setz eyn zirkel mit dem eyn fuß in den puncten. f. vñ den andern in den puncten. d. vnd reiß rund vnder sich/ durch die aufrechte. 5. e. Darnach setz den zirkel mit dem eyn fuß auff die ander seitten in den puncten. g. vnd den andern in den puncten. c. vnd reiß von dann vnder sich/ wo sich dann dise zwu krum linien schliessen an der aufrechten 5. e. da setz eyn. h. Darnach theyl. h. 10. mit eynem puncten. i. in zwen gleiche felt/ vnd setz den zirkel mit dem eyn fuß in den puncten. i. vñ den andern in die zirkellini. c. h. auff das kůrkest so du sie erreichen magst/ Vnd reiß von dann rund herum/ bis zu dem andern reiß. h. d. Also ist dise eyn lini gemacht/ wie sie dann hie vnden mit allen nůtigen linien/ vnd auch bloß auffgerissen ist.